



04 APR, 2025

115 pemilik dibenar melawat kediaman secara berfasa

Kosmo, Malaysia



115 pemilik dibenar melawat kediaman secara berfasa

SUBANG JAYA – Pemilik 115 kediaman yang terjejas akibat kebakaran saluran paip gas di Putra Heights di sini dibenarkan masuk ke rumah mereka secara berfasa bermula semalam.

Pegawai Daerah Petaling, Huzunul Khaidil Mohammed berkata, fasa pertama melibatkan seramai 41 pemilik rumah di Jalan 1/3A, yang dibenarkan masuk bermula pukul 9.30 pagi bagi tujuan pemeriksaan keselamatan, khususnya melibatkan pendawalan elektrik.

"Jika pendawalan berada dalam keadaan baik, bekalan elektrik akan disambungkan semula.

"Penduduk juga akan menjalani pemeriksaan inventori sebelum dibenarkan menetap

kembali di kediaman mereka," katanya ketika ditemui di sini semalam.

Beliau menambah, selepas selesai fasa pertama, kemasukan penduduk bagi fasa kedua dan ketiga akan diteruskan mengikut prosedur yang telah ditetapkan.

Salah seorang penduduk, Aziz Jidon, 69, berkata, dia telah dibenarkan masuk ke rumahnya di Taman Putra Harmoni di sini untuk mengambil barang keperluan penting kelmarin, manakala semalam dia diberi peluang untuk membawa keluar kenderaan.

"Jika dibenarkan masuk, saya amat bersyukur sebab banyak barang yang saya nak tengok dirumah.

"Apa-apa keputusan saya ikut sahaja, kalau boleh masuk kita

masuk, terima kasih atas tindakan pantas pihak berkuasa, saya amat hargai," ujarnya.

Sementara itu, Iqman Zikry, 24, berkata, maklumat yang diterima buat masa ini hanya pihak berkuasa menjalankan siasatan mengenai elektrik di rumah.

"Kalau boleh masuk alhamdulillah, terima kasih kepada semua yang memudahkan urusan mangsa," katanya.

Kelmarin, Ketua Polis Daerah Subang Jaya Asisten Komisioner Wan Azlan Wan Mamat, memaklumkan bahawa Jabatan Bomba dan Penyelamat Malaysia (JBPM) bersama Tenaga Nasional Berhad (TNB) akan menjalankan pemeriksaan akhir pendawalan di kesemua 115 rumah semalam.



SEBAHAGIAN penduduk dibawa menaiki trak untuk masuk ke kawasan perumahan bagi melihat kediaman masing-masing.